

Vol. 43		Issue No. 42		Ramhlun North: Ni 18 October, 2025	
BRANCH THU THAR ■ Pu Lalrampana,V-Sec. leader chuan thlanmual step a hnawih tur red oxide 20 litres a rawn thawh a, Branch hruiatuten lawmthu an sawi. ■ CCTV Monitor chu tek in a den chhiat avangin YMA Committee Room-a Monitor awmsa chu hman tura ruahman a ni. ■ Chair te enge maw zat lei tura ruahman a ni. SUB.COMT THU THAR ■ Library Sub-Committee: Ramhlun North Branch YMA Li-brary Sub-Committee chuan Best visitors of the month, October, 2025 atangin a siam dawn a, mipa leh hmeichhia tan lawmman hrang siam a ni dawn a ni. SECTION THU THAR ■ Khuangchera Section: Ni 13.10.2025 (Thawhtanni) zan khan section committee ten Pi Zoramthangi K-Sec. te Balu thiar sum tuak hnatlang neih ani a, member thawk chhuak kan tha in inhlawhna siamsaktu te chungah lawmthu kan sawi e. ■ Vanapa Section: Pu Mapiana, Ruallung khua atangin khuangvuak fung tha zet mai pair hnih kan dawng thar a, a chungah section hruiatuten lawmthu an sawi. ■ Neuva Section: Member thar mi sawm (10) an awm a, ti hian an vaiin member 482 an ni ta. ■ Chawngbawla Section: Ni 25.10.2025 hian Section Committee intuaitharna an hmang dawn a, mem-ber ten hun remchang lo insiam turin an inngen a ni. ■ Library Duty turte Ni 25.10.2025 1.Tv.Lalrintluanga 2.Tv.Vanlalhriata 3.NI.Lalmawizuali 4.NI.Lalrinsiami 5.NI.Lalmuanzovi 6.NI.Vanlalhruaii 7.NI.Lalnunfeli		YMA INKHAWMPUI LIAN VAWI 75-NA (Chengkawlawn Rûn, Sakawrdai-ah) Ramhlun North, the 18th October, 2025: Ni 21-23 October, 2025 chhung hian Chengkawlawn Rûn, Sakawrdai-ah YMA Inkhawmpui lian vawi 75-na chu hman a ni dawn. Ni 21.10.2025 (Thawhlejni) zan hian Vantlang Inkhawm (Palai lawm zan) a hun hman tur a ni dawn a, Pu Roneihthanga, Treasurer, Central YMA in a kaihhruai dawn a, Palai lawmna thusawi hi Pu T. Lalropuia, Chairman, Organising Committee in a nei ang. Pu Lalchhandama Ralte, Bialtu MLA in Souvenir a tlangzarh bawk ang. Annual report leh Finance report bakah heng lawmman te hi sem a ni bawk ang - Ramngaw leh Nungcha humhalh tha, Tuihna humhalh tha, Luidung humhalh tha leh Chanchinbu la tha. Hruaitu hlun chawimawina neih tur a ni dawn bawk a, heng bakah hian Mal zai, zaipawl, hnam lam leh adangte ngaithlak leh en tur a awm bawk dawn a ni. Ni 22.10.2025 (Nilaini) hian chawhma dar 10:30 ah YMA Exhibition hawn a ni dawn a, dar 11:00 atangin rorel tan tur a ni ang, rorel inkhawmah hian member boral sunna bakah budget (2025-2026) pharh a ni bawk ang. Rorel Inkhawmah hian kan branch chanvo Live band pawh neih tur a ni ang. Rorel hlan hian Variety programme, Sakawrdai Community hall-ah neih a ni dawn bawk a ni. Zan lamah hian Vantlang inkhawm a awm leh dawn a, khuallian atan Pu Lalduhoma, Chief Minister a ni anga, Branch YMA chanchinbu tha lawmman sem a ni dawn a, hruaitu hlun chawimawina neih a ni leh dawn bawk a, item hrang hrang ngaihtlak leh thlir tur a awm bawk ang. Ni 23.10.2025 (Ningani) ah hian kum 2025-2027 chhung atana Central YMA hruaitu thlan a ni dawn a, inthlan hlan hian Sakawrdai Community hall-ah Variety programme a awm bawk ang. Zan lamah hian Vantlang inkhawm (Palai thlahna) a awm leh dawn bawk a ni. Heng a hnuaia mite hi rorel agenda turte an ni :- A. YMA KHAWIH: 1. YMA inkaihhruiaina leh nihphung leh hruiatute mawhphurhna, rampumah inzirtirna neih ni rawh se. 2. Mizoram chhunga hnamdang sumdawng, phalna nei lo tam ta lutuk hi titem turin YMA-in hma la rawh se. 3. Mizo hmeichhia ten hnamdang pasala an neih zel loh nan Central YMA hian inzirtirna nasa zawkin kalpui rawh se. 4. Mizo Infiamnate chawisan a nih theih nan Central YMA-in hma la rawh se. 5. Zohnahtlak chi peng hrang hrangte Mizoram a chengte zingah chi bil hmalakna a awm tawh loh nan Central YMA-in hma la rawh se. B. SAWRKAR KHAWIH: 1. Inner Line Permit (ILP) hi tun aia khauh leh awmze nei zawka kalpui a nih theih nan YMA-in Sawrkar-ah thlen rawh se. 2. Tui hnar humhalh dan siam ni rawh se. 3. Mizoram chhunga inkalpawhna kawngpui hrang hrang a chhiat avanga mipuiten harsatna kan tawh nasa lutuk thin hi a lo ziaawm theih nan Mizoram Sawrkarin tun aia chak zawkin hma la rawh se. C. KUMPUAN RAWTNA: 1. Ruihhlo Do 2. Ram leh hnam humhalh YMA INKHAWMPUI LIAN A KAN BRANCH CHANVO YMA Inkhawmpui Lian vawi 75-naah kan Branch chuan Special Item atan Zaipawl leh Recitation kan nei dawn a. Zaipawlte pui tur hian kan veng nula lam thiam tak tak mi pali thlanchhuah an ni a, beng bakah mit thlenga tlai turin inbuatsaihna kalpui mek a ni. Tin, Recitation sawi tur hian NI. Lalbiakhlui, K-Sec. chu ruat a ni. Special item nei turte hi kan theih ang anga tawiawm turin kan in sawm nghal bawk a ni. Kan Branch aiawhin heng mite hi palai tura ruatte an ni: 1. Pu R. Lalrinmawia 2. Pu Vanlalrova 3. Pu Thandiangliana 4. Pu VL Pianruala 5. Tv. Eddie Lalfakzuala 6. NI. Laldusangi Pachuau Pu Vanlalrova, kan Branch OB hlui chu hruaitu hlun chawimawina dawng tur zingah a tel a, kan chhung takzet a ni. He Inkhawmpui pual hian thlengtu Branch tanpui nan kan Branch chuan Rs. 5,000/- pek nise tiin a rel a ni.			

 Editorial
YMA Inkhawmpui

Kumin hi YMA inkhawmpui liana vawi 75-na a lo ni ta der mai. YMA member, YMA Inkhawmpui liana la kal miah lo pawh a awm theih awm e. Mizorama NGO, tlawmngai pawl lian ber a ni a, inkhawmpui lian erawhin ngaihhlut a hlawh tawk lo deuh em aw a tih theih. Engvang nge ni ang le? Kohhran Thalai inkhawmpui te hi chu branch hrang hrangten Bus pahnih/ pathum kan hmang thin a ni si a. YMA hian tan lak kan ngai ta deuh nge ni ang a, kan hun hman dan hian mipui a hip ta lo le?

Central YMA hi inkhawmpui lian kaltlanga hruaitu inthlang thin kan ni a, inthlan kum hian inkhawmpui lian kal pawh kan thahnem deuh nite pawhin alang. Inthlan loh kumah hian conference hmangtu pawh kan tlem deuh em aw a tih theih. Kumin hi hruaitu inthlan kum a ni a, conference hmangtu pawh kan thahnem deuh turah a ngaih theih.

YMA inkhawmpui lian hi kumtin kan hmang thin a, kum khat danah tal hmang ta ila kan ngaihlu deuh ang em? Kan hlawkpui zawk ang em? Ngaihtuah a ngai khawp mai. Member-te pawhin kan hlut vak loh chuan kumtina inkhawmpui lian lo hman hi a hlawk thei lo ang.

Chutih rual chuan member-te hian YMA inkhawmpui lian hi ngaihhlut nachang kan hriat a tul. Inkhawmpui lian kalte pawh kan intihhmuh a hun khawp mai. Hruaitute chauh kuta kan dah chuan a hlawhtling tak tak thei lo vang. Inkhawmpui lian kaltlangin YMA kalphung tur kan relin kan duang thin a ni si a.

Kumin YMA inkhawmpui lian neihna hmun tur Sakawrdai khua hi Mizoram hmarchhak khaw lian ber a ni a. Conference programme-in min hip lem lo a nih pawhin Sakawrdai hmu tur hrim hrim pawhin i zuk kal ve ang u hmiang. Nakumah chuan kan kal thei tawh lo mai thei asin. YMA inkhawmpui lian kal ve i tum em?



CHALFILH TLÂNG

He tlâng hi Mizo tlâng sang zingah chuan, tlâng thengthaw nuam leh vawt tak mai a ni a. Fûr lai phei chuan chhum chhah takin a bawh lûk thin. Chhumin a bawh lûk reng avângin, khawthlir na atana tlâng tha tak ni mahse, khaw thian hun tih loh vah chuan khawthlir nan a remchang vak lo. Tûnah chuan a bul vela khua te'n loah an neih nasat avângin, ngâw hmun tha tak thin kha an tu dar zo tawh a ni. Chalfilh tlâng sang lai Filhpui hmunah sawrkar in Tourist Lodge tha tak a sa a, a tlawhtute tan pawh han riah theih nghalna mai tur hmun a awm.

Chalfilh tlâng hi a awmna ram chhunga hming langsar leh hriat hlawh ber pakhat a ni a, Mizoram Legislative Assembly Constituency bial pariatna hming putu a ni.

Mizoram hmar lam, Aizawl chhak lawk, Darlawn tlâng dung kawngpui bul maia awm a ni a. Mizoram lui hmingthang tak zinga mi, Tuirial lui chhak deuha awm a ni.

Tlâng hlawm lian tak mai a ni a, tlâng hmingthang dang ang lo takin, kham chawi hmuhnuam tham a nei hran lo. Tlâng sang tak, a chhip lam zawl phâr duai mai a ni a. A chhip zawl chu phul hmun a ni a, chutianga phul hmun inpharh duai mai, thingin a hual hmun a nih avâng chuan 'a chhip a filh e' tiin Chalfilh hming a pu ta a ni.

Sawi dan pakhat lehah chuan, he tlâng chhip chhim lam tawp chu a phul deuh hlek a, chumi lam chu a chhip an ti a. A lu ah chanin a kawlh lul a, 'a filh e' tiin a tlâng hming chuan Chalfilh tlâng a pu ta a ni.

Mizoram tlâng sang zingah hian san lamah pasarihna nia hriat a ni. 1866 meter a sang a ni. Tlâng theng thaw nuam tak mai, a bul vela tlângte hnuaichhiah lurh mai a ni a. Khaw theng thawt lai chuan khawthlir nana nuam tak a ni. Chhak leh thlang, chhim leh hmar, a lang thui em em a. Silchar phaizawl pawh a lang thei.

Sawi tawh angin tlâng hlawm lian tha tak a ni a. Chhim leh hmar zawngin a in kham ruah a, a chhim lam tawp chu a phul deuh hlek a. A chhip chu thing to lovin a filh rull a, a phir rual bawk a. A inlen hleih hle a, a phir lian zawk chu, 'Filhpui' tih a ni a, a phirte zawk chu 'Filhte' tih a ni. Tlâng pangah hian tun hma chuan thing a to khat vek a, ngâw hmun mawi tak a ni thin. A chhipah chuan phul a to a, filhpui hmun phul zau tak mai chu Vanpuia hmun tih a ni. Tlâng pang ngâw dur khup thin chu a bul vela awm te'n an vah chereu tawh avângin thing hmun tha tak tak chu la awm bawk mahse, ramchhe bàwm Luang leh thâng a tam hle tawh a ni. Tlâng sang tih takah a pang tawn tawn chu a awih hle a, a chhip zawl rai phir rual bak chu hmun awih tak tak a ni hlawm.

Nipui laia a tlâng bul thut lam a lum huam lai pawhin a tlâng chhip Vanzau hmun chu

Air Condition hmun niawm takin a lo dai ruih thin. Thlasik lai hi chuan a tlâng chhip lam hi chu duh aiin a vawt emaw tih mai tur a ni. Zo thlifim a thaw heuh heuh reng a, hengte avâng hian khaw vawt ngaina lo tan chuan awmna chi a ni lo. Eng lai pawhin a vawt lam a pawl mah zawk. A tlâng chhipah hi chuan chhun ni sen sa hnuaiah pawh kawrlum hak a inhmeh reng mai a ni. Mizoram tlâng sang zingah hian a vawt pawl tak a tling ang. Kumkhaw tlaitluana a vawh rengna hmun a ni.

Chalfilh tlâng chhip hi, tlâng dang ang lo takin englai pawhin a vawt bik a, boruak a thiang em em reng a. Nipui khawlum huam huam hnuaiah pawh, he tlâng chhipa kal chuan, rei lo teah vawt kan ti thuai a, kawrlum hak pawh a inhmeh nghal em em thin. Tlâng sang dangte ang lo taka a vawh bikna hi a danglamna pakhat a ni. A bul thut lam lum huam mah sela, tlâng chhip erawh chu a dai tlat zel. Thlifim a thaw heuh heuh reng a, fûr lai phei chuan chhum in a bawh reng thin a ni.

Tlâng mual lian tak mai a ni a, a tlâng bul thut lam chu rem deuh mahse, a sang tulh tulh a, a awih tan nasa deuh deuh a, a tlâng chhip erawh a zawl nuam hle thung. A leilung hi hmun tam tak chu lei thil, lei phihril leh lungte thil hmun a ni a, a bul thut lam aiin a tlâng pangper leilung chu a chhe zawk. A hmun zawl Filhpui leh Filhte te erawh lei tha hmunte pawh a awm a, lungpher leh lungpui lian tak takte pawh hmuh tur a awm.

A chhip zawl bawm hmun thenkhatah chuan, Chhura rual rual thing mawi tak tak a la ding thelh sung a. Tlâng sang chhipa thing awm tih takah an tuar fei hmel in thingsam ten a bawmin, Nauban chi hrang hrang pawh thahnem tawk tak a awm. A tlâng bul thut vela thing awmte chu, tuk dar a ni tawh a. A bul vela khua te'n chak lak nan leh ei leh bar zawn nan an hmang nasa hle a ni.

Hmanlai atâng tawhin pasal thate lunglenna hmun a ni a, sa chi hrang hrang an tam em em thin. Vanpuia leh a hote an awm lai phei chuan sa a tam avângin an hnianghnar em em a, nuam an ti hle a ni. Tûnah erawh chuan a ram a buai zo ta a, tun hma-a sathâr te chena awm thin kha hmuh tur a awm ta lo. Tûnah chuan kel vulh nan an hmang a, Mizo kelin a ngeih hle a, a tlâng chhip phul hmunah te tlat tirin an pung chak hle.

Hmanlai chuan tlâng lian leh tlâng sang mak deuh te chuan, tlâng Lal neiin an ngai zêl a, an be thin a ni. Chalfilh tlâng pawh hian tlâng lal a nei a, a zawlte chu Chhiarchhohpuii a ni, an ti. Chhiarchhohpuii hi a thikthu a chhe hle a, thil pawh a ti thei hle in an sawi thin. Ani ti lungawi lote chu, tlâng huai hian a tina mai thin a ni. A lawm zawng mi chu sa tinrenga kah tir thin bawk.

Mizo tlâng sang dangte ang bawkin Mizo history leh thawnthu nen inkaihnnawih chanchin ngaihawm tak tak a nei a. Tûn thlenga a vela mite'n an sawi thin chu, Vanpuia leh a hote an awm thu hi a ni.

(Issue leh a chhunzawm tur)

Editor: Eddie Lalfakzuala (7005269255); **Jt. Editor-te:** Lalrotluangi Zote, RK Lalmuanpuia, Lalhntluanga, Vanengmawia
Manager: C. Lallianzuala (9862365843); **Asst. Manager-te:** Zodingliana, Lalrinchhana, Lalrinawma
Circulation Managers: PB Lahuapzauva, Samuel Lahlpuia, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia



ZIN & HAW

■ Pu Lalthlengliana, ECM chu hna thilah khawchhak tlangdungah a zin.

■ Pu Lalremsanga Hnamte, ECM hna thila Buhban a zin chu a lo haw leh ta.

■ Pu Lalnuntluanga, kan Joint Editor chu West Lungdar Salvation Army Biak In hawnaa a tel turin a zin.

■ Pi C. Lalchhandami w/o Roṭhuama leh Pi Baby Zohmingliani w/o Lalnunpuia, C-Sec. te chu hna thilah Malaysia leh Vietnam-ah an zin.

■ Pi K. Zonunsangi w/o Benjamin Lalduhawma, N-Sec. chu Kolkata-ah in check-up turin an kal. A fanu Sarah Laldinsangi'n a hruai.

■ Pu Henry L. Hrahsel te nupa, C-Sec. an tunu tlawha Shillong zin chu dam tak in an lo haw leh ta.

■ NI. Lalronguri, S-Sec. chu in check-up turin Mumbai-ah a kal.

■ Pu PC Laldingliana te chu Kolkata-ah an zin.

■ Pi Laldinpuii w/o Pu Malsawmthara, K-Sec. chu an pa damlo awmpui turin tunkar khan Kolkata-ah a kal.

■ Pu Chalthanghlira, K-Sec. chu tunkar khan NEIGHIMS ah inenkawl turin an kal.

■ Pi Lalmuanpuii d/o Pu H. Lalthanga (L), C-Sec. Apollo Hospital, Kolkata-a in check-up tura kal chu an lo haw leh ta. A fanu NI. Lalmingsangi'n a kalpui.

■ Tv. Lalremruata s/o Kapmawii, C-Sec. hna thil a chhim lama zin chu tunkar khan a lo haw.

■ NI. Caroline Lalchhuanawmi d/o C. Lalrosanga, N-Sec. Jaipur, Rajasthan a awm chu chawlh hmangin arawn haw.

■ V.L. Hlimpuii d/o Runrinawmi, N-Sec. chu a u te tlawh in Dehradun-ah a zin.

■ Pu Robert Lalhmingthanga, S-Sec. te chhung chu chhungkaw pawimawh tiin Delhi-ah an zin.

■ Tv. Lallawmzuala s/o H. Lalchhuana, K-Sec. chu Khanpui ah a zin.

■ Pu Emanuel Lawmkima, C-Sec. Hnabsin Kut-a stall han hawng chu a lo haw leh ta.

■ Tv. Josiah VL Awmawia s/o Benjamin Lalduhawma, N-Sec. chu Khanpui ah a zin.

■ Tv. George Intoate c/o Zothangsang Intoate, C-Sec. chu a hna thawhna hmun Kolasib atangin a lo haw.

LEI PIAH LAMAH



Zaithanmawii, K-61, w/o RC. Zauva (L), V-Sec. chu ni 12.10.2025 dar 2:40 PM khan a boral a, a ruang hi tlaivarpui anih hnuah a tuk ni 13.10.2025 chhun dar 12:00 ah Ramhlun North thlanmual, Zemabawk ah vuiliam a ni.



HC. Lalhriatpuia, K-30 s/o HC. Lalrinzuala (L), C-Sec. chu ni 15.10.2025 dar 9:00 PM khan a boral a, a ruang hi tlaivarpui anih hnuah a tuk ni 16.10.2025 chhun dar 12:00 ah Ramhlun North thlanmual, Zemabawk ah vuiliam a ni.



Lalmuankima, K-54 s/o Ralliana Ngente (L), V-Sec. chu ni 16.10.2025 dar 1:00 AM khan a boral a, hemi ni vek ni 16.10.2025 dar 2:00 pm ah Ramhlun North thlanmual, Zemabawk ah vuiliam a ni.



Lalduhzuala, K-35 s/o Lalruatkima, V-Sec. chu ni 17.10.2025 dar 3:40 AM khan a boral a, hemi ni vek dar 1:00 pm khan Ramhlun North thlanmual, Zemabawk ah vuiliam a ni.



Lusun khawhar chhungte thlamuantu Pathianin vengin awmpui mawlh rawh se.



DAMLO

■ Pu PB Lalramthanga, T-Sec. chu Greenwood Hospital ICU-ah enkawl mek a ni.

■ Pi Lalrimtuii w/o Tlangtihlina, K-Sec. chu Civil Hospital, Aizawlah a pum zai a ni.

■ Pu Benjamin Lalbiakmuana, C-Sec. chu a kala lungte awm Ebenezer Hospital-ah zai a ni.

■ Pu Sapremthanga, S-Sec. chu ZMC & H-ah enkawl mek a ni.

■ Pu JR. Malsawma, T-Sec. chu taksa chak lohna avangin LRM Hospital-ah enkawl mek a ni.

■ NI. Lalmangaihzaui d/o Rosangpuia (L), T-Sec. chu LRM Hospital-ah kal a lung tē awm avangin enkawl mek a ni.



LAWMAWM

■ Tv. Moses Lalruatfela s/o Lalfakzuala Khiangte, V-Sec. chu Directorate of Information & Public Relations hnuaiah Audio Visual Production Assistant Grade-III hna a hmu thar.



KOHHRAN

■ **The Salvation Army:** West Lungdar Salvation Army Biak In hawnaah Ramhlun Corps- te an lo sawm angin mi sawm (10) an kal.

■ **Presbyterian Kohhran, Ramhlun North:** Vawiin hian Ramhlun North Kohhran hnuaiah Social Front Committee te kaihhruaiin Primary atanga Senior Department naupang leh zirtirtu ten vengchhung bawlhhlawh lakkhawma tihfai hna an thawk a. Mi 176 an thawkchhuak a, group 4 ah inthenin vengchhung bawlhhlawh chharin an tifai a ni.

■ **Presbyterian Kohhran, Ramhlun East:** Vawiin hian Ramhlun East Kohhran, Sacrament Department zirlai mi 34 te chu zingkarah exam neiin nilengin camp an nei chhunzawm a, zanah danchhunga lawmluh an ni ang.



THILDANG

■ **AMC Electoral Roll Revision:** Summary Revision of Electoral Roll under Aizawl Municipal Corporation neih mēk a ni a. Ni 01.01.2026 a kum 18 tling chin (01.01.2008 leh a hmalam a piang te) mahni bialtu LLO/ BLO te hnenah ni 25/10/2025 ral hma in inthunluh dilna thehluh theih a ni.

Tin, ni 20.10.2025 (Thawhtanni) leh ni 25.10.2025 (Inrinni) hian Govt. Ramhlun North P/S ah zing dar 10:00 atanga chhun dar 12:00 thleng LLO/ BLO te an thu dawn a, hetah hian thun thar tur te tan a hmunah hian a tih theih dawn bawk a ni.

ETHAN GO MOBILE
RAMHLUN NORTH
9863179654/ 7005693797

*Authorised dealer in NOTHING CMF mobile with Original Accessories

*Authorised dealer in Google Android Tv @ SONY, XIOAMI & PANASONIC

*All brand warranty + extra DISCOUNT on TV temper glass & V-Guard stabilizer for customer)

(Box open, refurbished & used item kan zuar ngailo)

Presbyterian English School (PES)

Presbyterian English School (PES), Ramhlun North Aizawl chuan kum thar 2026-27 session atan KG-1 Admission, November 2025 chhungin a hawng dawn a, lut duhte chuan dilna form siamsa hmangin ni 1-31.10.2025 chhung dil theih a ni a, form hi School office-ah office hun chhungin lak theih a ni ang. Dt. 5 & 6 November 2025-ah interview neih a ni ang. Admission dil tu chu April 2026-ah kum 4 a tling ngei tur a ni.

ARTICLE

Ka ei lo!

- Remruata Renthlei, T- Sec.

Inkhawm zanah YMA Tlangauna In kawtah kan innghak mai thin a. Kan titi luam ang a, dar nawn hma minute 5 a la awmin kan lut thla thin. Nilai zan khan a rawn muang riau a. 'Ka hritlang lutuka' a ti deuh tawk tawk a. A aw pawh a chhuak tha meuh lo.

Biak In tlar hnungberah kan thu dun thin a. A hnung ber a thut a thlan chhan hi a stroke tawh avangin din leh thut a awlsam lova, a che zung zung thei lo, tlema boruak thawveng hret a duh bawk.

Nuamsam chiah lo a intih avangin pawnah ka lo thu mai ang, a ti a. Hun reitak hnuah M-a tel lovin Biak In ka pen lut a, kan thutna thinah midang an lo thu bawk a, hmun dangah ka thu.

Inkhawm banah ka hmu hman ta lova, hun dangah chuan kan titi khawtlai deuh tlangpui thin a nia. Biak In chhung ka luh dawna M-a ka tih kha ka biak hnuhnun ber a lo ni ta reng mai. M-a kha kan unaua upa ber ai pawha upa zawk a ni chungin KTP kaltlangin kan inkawm ngeih em em, rualpui kawmin min kawm a, U Mk ka tih kha tul a ti lo va, M-a ka ti ve ta zel a ni.

M-a kha Kristian conservative dik tak a nia, thil tha duh, dik leh fel taka nun hman tum a ni bawk. Dik chu dik, dik lo chu dik lo tia hringnun hman tlat tum niin a suthle ve ngai lo. M-a kha chuan ‘Thu Sawm Pek’ a nunpui riauin ka hre thin.

Kristian tlangval a nia, a sawi ve duah lo, a nunpui thung. Inkhawm nise a aia inkhawm tha an awm chuang lovang. Nikum Kohhran inkhawm kha a inkhawm kim bawk. Kaminah pawh a thih zan thlengin a la inkhawm kim bawk. Ka inkhawm loh a awm palhin M-a hnenah a chhan ka sawifiah thin. Kohhran tana mi rinawm a nia, a thih hnuah kohhran tana mi rinawm a nih zia kan hrefiah chauh thung ang.

Mi thil chik mi a nia, mite sawiah ngaihdan a siam ve thlawp ngai lo. Amah ngeiin 'chhuichianna' a nei phawta chutah thutlukna a siam thin. Dik chu dik, dik lo chu dik lo ti tlat mi niin a nunpui Christian principle chu a ‘compromise’ ve ngai lo. Chuvanga sel hret chak pawh kan awm thin ang. Mahse, a nghing ngai lo.

Mihring tihlawm leh tlawn a tum ngai lo va, kan KTP ho lai pawhin 'amah lo thlawp tur' a zawn ka hre ngai lo. Tha nia a hriat chu a fak mai a, a huaisen bawk. A kawm te ngei ngei pawh ‘Christian values’ nia a ngaih kalha an che nia a hriat chuan a khak mai.

M-a khan “Dik tak leh fel taka nungte chu an lamah Lalpa atang tlat thin” a ti thin. Chu chu a conviction a nia, a nun pumah khan dik tak leh fel taka tih kha a tum thin. M-a kha sawisel fakna tur a vang a nia aw.

Dik leh fel nia a hriatah chuan huaisen takin a tang mai a. Amah chauh pawhin atang mai, phungbawm sawm emaw a ti ve ngai lo. Milian leh mite a hrutual vek bawk.

Management thiam tak mai niin organiser tha deuh a ni bawk. Taxi driver a nih lai atang tawh pawha mahni intodelh em em, sum hmanna tur chhut fel thlip thlep, tul lova sum hmang lem lo a ni. Whatsapp a 'Tlangau' a manage dan te hi fak a phu ngawih ngawih. Information pawimawh a hun takah min hlan chat chat thin, hetiang felfaia kalpui nan hian a hun leh tha, ngaihtuahna a seng nasa ang a, feltaka kalpui turin taimakna neiin management a thiam tih a hriat reng. Kan vengin information systematic taka kan kalpuia sulsutu chu M-a kha a ni. Khawtlang tana fak phut lova mipui tana rawngbawlna a kalpui kha ram leh hnam hmangaihtu dik tak a ni.

Thil chik em em mai a nia, a hriatrengna a tha bawk. Thil a enliam emaw mai mai ve lo va, mi a sawisel tawh chuan chhan leh vang fel tak, dinna mumal tak a neisa tawh tihna a ni. A nun kha a 'class' a ni. Class kan tehna hi mihring a nihna anga a knowledge leh wisdom, values a neih leh lakkhawm avanga a finna te kan enkan daih a, a incheina, rosum, a tle neuh neuh te chu class teh nan kan hmang a nih chuan kan tisual ang.

Kan KTP ho lai khan ngaihtuah tur thil emaw a awmin sir hrang hranga thlirna neih thiamah a chungnung ber zingah a telin ka hria. A sawichhuah/fiah lam erawh a thiam lo va, a conservative burna in tawngkam bungrua pawh a neih tlemtir deuh vang pawh a niang. A chang chuan a ngaihdan sawi danah te 'strong' mah mah tihchang ka nei a, mahse, a zia a nia ka tia ka pawm mai a. Soft te, strong te kan awm tur a lawm, mahni duhdan anga mite awm tir vek tum leh mahni ngaihdan a zira mite tehvek tum chu puitling lo ka tita thung.

M-a tei theih hauhloh chu rawngbawltu inthlahdah a ni a, a thikthuchhiatna ber pawh rawngbawltuteah a ni bawk.

M-a, Nilai zanah pawh ‘Tlangauna bulah’ ah ka lo nghak ang che. Van atangin min lo thlir tal la...Min lo thlir loh chuan ‘ka ei lo’ viau ang.



ADVERTISEMENT

KC TUI

(10-2)

Tui thianghlim tak PHE a quality test thlap, PickUp-in 2,000 litre kan pe thei reng e. Ramhlun North veng chhung tan discount kan pe e.
Ph: 7005010327 / 9774223462

JM SEPTIC TANK SEVICE

Septic tank khat paih fai, comode block, pipe fit, soak pit tha lo leh a thar pawh kan siam thei reng e. Kan sulhnu a fel fai a, service hlun leh rintlak kan ni e.

Rate inbiak remna. Registration: MRS 542
Contact: 9862476439 / 9436199884 (10-1)

SAWMA SEPTIC TANK SERVICE

Septic Tank khat paih fai, commode block, pipe fit, soak pit thar siam engkim kan ti thei e.

Rate: Inbiakremna Ph: 8119969364 (10-1)

KHIANGTE SEPTIC TANK SERVICE

Septic Tank khat paihfai, Comode Block, Soak pit, Pipe Fitting, Repair engkim, khur chhung lutin, a neitu te lungawi na thlap in kan thawk thei e

Contact - 9862344971 Bawngkawn South (10-1)

L.H SEPTIC TANK SERVICE

Septic tank paihfai leh repairing engkim kan thawk thei e. Kum 17 chuang experience nei kan ni e.

Rate:4500 per trip
Ph.6909183193 (30-20)

SEPTIC TANK KHAT & REPAIR

Septic tank khat paih leh repair kan ti thei reng a, rate chu inbiakremna a ni ang. ⁽⁵⁻³⁾

Contact: 6033373188/9612376373 | C/o Marina: 9436140350

SANGA SEPTIC TANK SERVICE

Septic tank paihfai leh repairing engkim kan thawk thei a, experience tha tak kan nei e. Rate hi INBIAKREMNA

Mb. 9863524969/ 9366506115 (5-2)

EMMANUEL PRINTING CENTER

SIGNBOARD

3D, 2D, Vinyl / Reflector, Flex

BANNER

Flex, Vinyl & Foamboard

Acrylic Memento & Sticker, etc

Oengchhung mi ngei min rawn pan ve rawh se.

Call & Whatsapp : 9774586640
Basic Mual, H.No D-119



HANDEL MUSIC SCHOOL
Presents

WINTER MUSIC CLASS

Piano, Keyboard, Guitar, Drums, Violin, Ukulele

Admission fee 500/-

Contact: 9856701540 / 8132843722